

INUIT ATAQATIGIIT

INATSISARTUNI



5. november 2013
UKA 2013/121.1
AH/ABE

Nunatsinni suliffeqarfiit namminersortut nutaat, aallartinneranniit sapinngisamik akileraarutitigit artukkorsorneqannginnissaat anguniarlugu, ukioq siulleq ataaseq akileraartannginnissamik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortat, Siverth K. Heilmann aamma Gerhardt Petersen, Atassut)

Ukiuni kingullerni pingasuni nunarsuarmi aningaasarliornikkut eqqugaaratarsimasinnaasut tungavilersuutigalugit Atassutip Inatsisartunut ilaasortaasa siunnersuutigaat, Nunatsinni suliffeqarfiit namminersortut nutaat aallartinneqartut ukioq siulleq akileraarutitigit akiliingiffeqartalernissaat anguniarneqassasoq.

Akileraartarnikkut aqqissuusseqqinnissaq ataatsimortoq Inuit Ataqatigiit angorusutaasa ilagaat, tamannalu pissutigalugu Naalakkersuinikkut siuttuutitaqarnitta nalaani Atugarissaarnermut Akileraartarnermullu Isumalioqatigiissitarsuup pilersinneqarnera siuttuuffigalugu.

Inuit Ataqatigiit isumaqarpugut Atugarissaarnikkut Akileraartarnikkullu Isumalioqatigiissitarsuup suliaasa tamakkiinerusumik nalilersuiffiginissaat piaartumik pisariaqartoq suliffeqarfinnut atugassarititaasut ilanngullugit.

Ukiut aggersut eqqarsaatigalugit malunnartorujussuuvoq sinerissami suliffeqarfinni ingerlataqartut siunissamut tunngasumik nalornisorujussuusut. Tamatumani eqqaaginnarneqarsinnaapput sanaartormik suliaqartut sinerissamiittut tamanna annilaangatigimmassuk. Nuuk-mi sanaartormerup ataatsikkut unitsinneqarnerata sinerissami sunniutigiumaagai, sunniutit maanna aallararput. Tassa sinerissami suliffeqarfiannguit Nuuk-mi sanartugassaarukkiartupiloorneq pissutigalugu suliffeqarfinnik Nuuk-mersunik annertuumik unammillerneqalermata, taamaalillutillu akiliisinnajunnaarnermik eqqorneqartalereerlutik, suliffeqarfiit qitiusumiittut amerlasuutigit unammisinnaasanginnamikkit.

Nalornissutigineqartoq alla tassaavoq, suliffeqarfiit aalisarnermut attuumassuteqartunik suliaqartut. Taakkua siunissami pisussaajumaartussanik nalorninertik pissutigalugu suliffeqarfinnik allartitsinissartik annertusaanissartilluunnit tunuarsimarfigigaat takoreerparput.

Siunnersuummut Naalakkersuisut ilaliinginnerminnut erseqqissaatigaat takorloorneqarsinnaasoq, suliffeqarfioreersut akileraarutinut akiliinginnissamik atuilluarnisartik siunertaralugu immikkortortanik pilersitsiortorsinnaasut. Ilimanartorujussuuvorlu sorlu sanaartormerik Nuuk-mi suliaqartut Nuuk-mi suliassaarunnermi sinerissami immikkoortortaqaalernikkut akileraartarnikkut oqilisaassineq atorluarsinnaagaat, taamaasillunilu aqqissuusineq siunertarisaminut atornani aqukkuminaassinnaasoq.

Naalakkersuisut taamatut naliliinerat isumaqatigaarput, tamannalu tungavigalugu siunnersuut isumaqatiginngilarput. Tassunga taarsiullugu inassutigerusupparput Akileraartarnermut atugarissaarnermullu ataatsimiisitaliarsuup isumaliutissiisutaa nalilersorneqassasoq suliffeqarfinnut sunniutigisinnaasai ilangullugit.